


Givhan long pikinini blong yu blong hem i stap sef taem hem i stap yusum intanet

Oltaem, ol pikinini oli wantem eksplor mo oli wantem save evri samting long wol we oli stap long hem, be tu, ol mama mo ol papa oli save wari long sefti blong ol pikinini blong olgeta, long taem we oli no stap yusum kompiuta, be espeseli taem we oli stap lukluk mo toktok long intanet. Hemia nao samfala samting we yu save mekem blong kipim famli blong yu i stap sef oltaem:

1. Kam antap wetem samfala rul we evriwan long famli oli save agri blong folem

- kipim rikod long haomas aoa wanwan memba blong famli i stap yusum intanet long wanwan dei.
- storian tugeta plante long wanem nao ol samting we pikinini blong yu i stap aksesem mo wajem long intanet.




2. Storian wetem hem long ol kaen gudfala rilesensip we i gat rispek long hem

- mekemsua se pikinini blong yu i savegud se hu nao ol bigfala man o woman we hem i save trastem.
- mekemsua se pikinini blong yu i savegud se hem i oraet blong talem 'nogat', mo i save olsem wanem blong luksave wan pesen we maet i wantem mekem i nogud long hem.

3. Gohed blong lanem niufala samting oltaem

- askem pikinini blong yu se wanem nao ol websaet mo ol sosel midia ap we oli laekem tumas, afta, yu lelebet yu daonlodem mo yu lukluk long olgeta blong jekem se oli olsem wanem.
- blong lanem moa long olsem wanem blong sapotem pikinini blong yu blong hem i stap sef gud oltaem we hem i stap long intanet, yu save lukluk long ol risos ya we oli prierem blong givhan long ol peren blong ol pikinini.



[netsafe.org: Advice for Parents](http://netsafe.org)

[netsafe.org: Parenting](http://netsafe.org)

[Facebook Parents Portal](#)

[Facebook Topic: Parents](#)


[getsafeonline.org: Safeguarding Children](http://getsafeonline.org)

[getsafeonline.org: Protecting Yourself](http://getsafeonline.org)


Sapot blong yu, blong pikinini blong yu, o blong ol fren blong pikinini blong yu, taem we i gat wan imejensi:

Sipos pikinini blong yu hem i go tru long wan had taem wetem internet

1. **Sipos pikinini blong yu i harem nogud tumas, gogo i stap traem blong kilim hem wan i ded o i luk olsem maet i mekem olsem, yu mas karem samfala stret sapot mo gudfala givhan wantaem nomo. No lego pikinini blong yu i stap hem wan nomo.**
2. **Faenemaot wanem i hapen – hem i neva let tumas blong yu statem blong storian wetem pikinini blong yu.** Sipos yu gat wan konsen se maet oli stap spolem o mekem i nogud long pikinini blong yu, yu no fraet blong storian wetem hem mo askem se wanem nao i tekem ples long hem.
3. **Yu mas soemaot long hem se yu wantem givhan long hem mo yu mas lesengud long hem.** I gud blong pikinini blong yu i glad blong tok stret mo talem ol tru samting long yu, be blong hem i open olsem wetem yu, hem i mas harem se hem i stap sef. Sipos hem i stap storian wetem yu, yu no katem o blokem toktok blong hem, be lego hem i gohed blong talemaot evri samting long yu.
4. **Fogetem evri narafala samting, be mekem hem i save se yu yu stap blong givhan long hem.** Pikinini blong yu i nid blong save se bambae yu wetem hem oltaem blong gotru long ol hadtaem wetem hem.
5. **No blemem pikinini blong yu o kritisaesem hem** from we i no hem we i mekem ol narawan oli stap spolem hem, nating we maet yu harem nogud o yu kros long hem. Traem blong no stap jajem hem from wanem we hem i stap mekem kasem taem we hem i fesem problem ya.
6. **Serem eksperiens blong yu.** Sipos yu traem putum yu insaed long situesen we pikinini blong yu i fesem, bambae i givhan long hem blong i save open mo i save storian wetem yu blong eksplenem wanem stret i tekem ples, mo hem i stap harem olsem wanem long hem.
7. **No promisem sam samting we bambae yu neva save mekem,** be letem pikinini blong yu i savegud se bambae yu givhan long hem blong faenem wan wei blong solvem problem we hem i stap fesem.



8. **Givim sam defren tingting o aedia long hem blong i save faenem wan rod blong dil wetem situesen.** No fosem hem blong mekem wan samting, be givim sam defren ansa we hem i save tingting long hem mo letem hem i faenem wan rod blong solvem problem we hem i ting se i stret. Pikinini blong yu i mas harem se hem i pat blong divelopem wan plan blong dil wetem isiu, mo hem i mas biliv long plan ya se bambae i wok, mo hemia nao rod blong mekemsua se plan ya i save gat sakes.
9. **Sipos yu ting se pikinini blong yu i stap long denja, yu mas tekem sam aksen wantaem.** Sipos problem i stap tekem ples long skul blong pikinini blong yu, yu mas toktok long prinsipal blong skul ya. Sefti blong pikinini blong yu hem i nambawan samting.
10. **Taem we yu faenem samfala nogud samting long intanet, yu mas ripotem i go long kampani we yu stap aksesem intanet tru long netwok blong olgeta.** Sipos i gat wan pesen we i stap yusum wan kampani blong intanet blong kasem o tagetem pikinini blong yu, yu mas ripotem hem. Evri intanet kampani mo ol websaet oli sud gat wan ples we yu save mekem ripot long hem, blong talemaot eni rabis samting long intanet we i nogud long yu o pikinini blong yu o eni narafala pesen. Blong kasem moa infomesen long olsem wanem blong mekem ripot long ol rabis foto mo muvi o vidio, mo ol post o ol pipol o ol grup we oli stap putum o yusum ol samting ya long Fesbuk, i gud blong lukluk long Ples blong [Kasem Sapot](#). Maet yu intres tu blong ridim sam rul long saed blong wanem we olgeta blong Fesbuk oli alaoem mo wanem we oli no alaoem, olsem ol [Stret Standad](#) blong folem long Fesbuk.



Sipos yu gat konsen se maet pikinini blong yu i stap aksesem samfala rabis piya o nogud muvi long intanet

Yu wantem faenem wan wei blong save toktok wetem pikinini blong yu long saed blong ol rilesensip, o long ol jenis we i stap tekem ples long bodi blong hem, o wanem we hem i stap lukluk long hem long intanet, be yu no save se bambae yu mekem olsem wanem? Hemia nao samfala tingting blong givhan long yu blong statem blong storian wetem pikinini blong yu.

1. Hem i neva eli tumas mo hem i neva let tumas blong yu stat blong storian wetem pikinini blong yu long saed blong ol stret fasin blong mekem fren, we i gat rispek, mo i no gat fasin blong fos.
2. I no stret blong givim panis long pikinini blong yu – samtaem ol pikinini oli stap pleplei long kompiuta mo oli mestem oli sek se oli stap luk ol samting we i no stret, o maet samfala fren oli sanem sam rabis piya i kam long olgeta, mo hem i nomal tu blong wan pikinini i wantem eksplo blong lukluk sam defren samting. Mekem fasin blong yu i kaen mo sofsof long pikinini blong yu, mo soem se yu andastanem gud situesen we hem i fesem.
3. Bes long level blong save blong pikinini blong yu, mo i dipen tu long kastom mo kalja blong famli blong yu, be maet i taem blong yu stat blong storian wetem hem se seks hem i wanem samting mo oli stap wokem olsem wanem. Hem i impoten blong storian long fasin blong man mo woman taem we oli lavem olgeta mo oli stap tugeta, mo i gud blong tokbaot ol tingting long saed blong ol baondari we i nogud blong ovarem, mo wanem we ol pikinini mo ol yangfala oli save mekem o oli no mas mekem, mo wanem nao wan stret ej blong oli stat blong tajtajem olgeta.
4. Sipos i gat sam nrafala studen we maet oli olfala moa long pikinini blong yu, mo oli soem ol rabis muvi long hem, i gud blong letem hem i save se sipos oli traem mekem long hem bakegen, hem i gat raet blong talem ‘nogat’ long olgeta, mo hem i save defren long ol fren blong hem, i no nid blong hem i mas mekem evri samting i semak long olgeta.
5. Mekemsua se hem i save gud se i tabu tumas blong serem rabis foto o muvi wetem eni nrafala pesen, mo i tabu blong storemap ol fael blong ol samting ya long wan kompiuta o wan fon o long intanet.

Blong lanem moa samting long olsem wanem blong sapotem pikinini blong yu blong hem i stap sef gud oltaem we hem i stap long intanet, [yu save lukluk long ol risos ya we oli priperem blong givhan long ol peren blong ol pikinini](#).

